

安岳縣志卷六

古蹟志

金石附

志古蹟者何為古也實為今也前不見古人如古人何後不見來者如來者何夫是以托之乎志也說者曰賈參軍杜工部信有然矣如釣鼇臺為天生何余曰此雖自然之物皆有自立之功故能無古無今砥柱乎中流也不然何以一枯樹一頑石竟與得秀最靈者爭焜耀於名區人不可為古人其如此枯樹頑石何故列之以為慕古者勸

唐賈島墓在治南三里安泉

通志作岳

山下詳後瘦詩亭記中

安岳縣志

卷六

古蹟

賈島墓誌集古錄唐蘇絳撰馮賢書碑以會昌四年立

在普州

賈司倉墓誌銘

唐蘇絳

公諱島字浪仙范陽人也自周康王封少子建侯於賈因而氏焉諡則大漢太傅寅則晉尚書由是徽音流遠祖宗官爵顧未研詳中多高蹈不仕公展其長材閒氣超卓挺生六經百氏無不該覽妙之尤者屬思五言孤絕之句記在人口穿楊未中遽罹誹謗解褐受遂州長江主簿三年在任卷不釋手秩滿遷普州司倉參軍請



侯待之以賓禮未嘗評人之是非丰骨自清冥搜至理  
悟浮幻之莫實信無生之可求知矣哉又工筆法得鍾  
張之奧所著文篇不以新句綺靡爲意淡然躡陶謝之  
蹤片雲獨鶴高步塵表長沙裁賦事略同焉攸望遭時  
紫泥必降優游華省遊泳清塗噫修短定期數豈能越  
會昌癸亥歲七月二十八日終於郡官舍春秋六十有  
四嗚呼死未浹旬又轉授普州司戶參軍榮命雖來於  
公何有公無子夫人劉氏承公遺旨粵以明年甲子三  
月十七日庚子葬於普南安泉山慮陵谷變遷刊石紀  
已矣馨若蘭薰

安岳縣志

卷六

古蹟

二

時絳忝公知己見命爲誌詞仍爲之銘曰猗歟賈君天  
縱奇文名高天下鶴不在雲蚤振聲光高步出羣今則  
表曰於戲有唐詩流賈君之墓按此碑剝落僅存二十  
九字語不相屬姑存之俟考

唐宣宗賜浪仙墨制大中八年立

弔賈浪仙

唐  
杜荀鶴

謫宦自麻衣銜冤至死時山根三尺墓人口數聯詩仙



桂終無分皇天似有私暗松風雨夜空使老猿悲

程 錡

倚恃才難繼昂藏貌不恭騎驢衝大尹奪卷忤宣宗馳  
譽超先輩吟詩下我儂司倉舊曹署一見一心忡

曹 松

先生不折桂謫去抱何冤已葬離燕骨難招入薊魂旅  
墳低卻草稚子哭勝猿冥漠如搜句宜邀賀監論

李 洞

一第人皆得先生豈不消位卑終蜀土詩絕占唐朝旅

安岳縣志

卷六

古蹟

三

葬新墳小魂歸故國遙我來因奠灑立石用爲標

薛 能

賈子命堪悲唐人獨解詩左遷今已矣清絕更無之畢  
竟吾猶許商量衆莫疑嘉陵四十字一一是天資

李 頻

秦樓苦吟夜南望只悲君一宦終遐徼千年隔旅墳恨  
聲流蜀魄冤氣入湘雲無限風騷句時來月下聞  
忽從一宦遠流離無罪無人子細知到得長江聞杜宇  
想君魂魄也相隨



僧宏秀

燕生松雪地蜀死葬山根詩僻降今古官卑悞子孫  
冢闌寒月色人哭苦吟魂暮雨滴碑字年年添蘚痕

崔塗

雕琢文章字字精我經此處倍傷情身從謫宦方沾祿  
才被椎蕤更有聲過縣已無曾識吏到廳空見舊題名  
長江一曲年年水應爲先生萬古清

劉滄

塵室寒窗我獨看別來人事幾凋殘書空蕭寺一僧去

安岳縣志

卷六

古蹟

四

雪滿巴山孤客寒落葉墜巢禽自出蒼苔封砌竹成竿  
碧雲迢遞長江遠向夕苦吟歸思難

鄭谷

水繞荒墳縣路斜耕人訝我久咨嗟重來兼恐無尋處  
日落風吹鼓子花

黃滔

曾搜景象恐通神地下還應有主人若把長江比湘浦  
離騷不合自靈均

歸仁



此臺如可廢此憾有誰平縱使迷青草終難沒舊名天  
悲朝雨色嶽哭夜猿聲不是心偏苦應關自古情

孫 諤

渡江始見長江縣返照雨餘邨落明此地曾經詩客到  
九秋風月至今清

聲名自古多身患夫子何爲一誦傷寂寞吟魂招不得  
水邊行客爲悲涼

張 蟻

生爲明代苦吟身死作長江一逐臣可是當年少知己

安岳縣志

卷六

古蹟

五

不知知己是何人

元進士孔 缺名

亂峯青抱石溪寒中有高人獨倚欄夜月龕燈曾禮佛  
秋風驢背偶驚韓殘碑剝落苔封篆古寺荒涼草壓壇  
我有新詩吟未穩推敲相憶路漫漫

明 李東陽 茶陵人

百里桑乾繞帝京浪仙曾此寄浮生葬來詩骨青山瘦  
望盡荒原白草平無地椒盤供廟祀有人驄馬問邨名

時盧侍御 穹碑四尺標題在詞賦風餘萬古情  
修復其墓



頓 鏡 涿州人

淚盡窮轅得舊京旋披叢灌拜先生桐鄉遠在今西蜀  
梓里遙憐古北平奔走髀消何事業推敲骨瘦是勳名  
太行秋色桑乾水野老相呼後世情

賈島故宅

寂寞長江簿推敲擅晚唐故巢畱梓里瘦骨寄桐鄉墓  
木蘿增葉秋花草墜香相傳夜鐘磬猶斷苦吟腸

登安泉山拜賈浪仙墓 有序 國朝 劉慶适 桐山

公墓在岳城南三里邑長虎林鄭公構祠安公靈

安岳縣志

卷六

古蹟

六

庚子春予同徐陳二君載酒往奠感公鬱不得志

而死乃誦昌黎贈公句

孟郊死葬北邙山從此風雲得暫閒天畏斯文終斷

絕再生賈島在人間以慰之並賦詩

苦吟一卷動千秋遺冢荒涼在普州白草繇芊藏狡兔  
青杉翦鬱見獼猴推敲任觸公卿道傲睨偏貽帝子羞  
載酒爲澆泉下恨三巴此日是名遊

陳之怵

誰憐詩骨在山根讀竟殘碑欲斷魂一任樵人除草木  
幾番行客薦雞豚騎驢聞說當官道奪卷曾經忤至尊



今日荒祠延竚處不堪灑淚下寒原

徐紫芝

空畱白骨瘞安泉斷碣零星淺草邊過眼滄桑唐世界  
感懷淒楚蜀山川到今華表無歸鶴當日朝端枉咏蟬  
寂寂荒臺憑弔久招魂何處慰詩仙

郡守 沈清任

深山冷翠微荒冢落斜暉誰哭詩魂瘦空披墓草肥一  
官名已悞萬里骨無歸韓孟猶相識知音自古稀  
此地遺仙蛻賢侯展歲時長阡須樹表短碣且題詩爵

安岳縣志

卷六

古蹟

七

重才應賤時違命更奇牛羊下夕坂回首客心悲

邑令 徐觀海

荒草西風裏重來展墓田數奇才最散魂冷骨應仙奪  
卷情何激敲詩事偶傳同時聲籍甚芸閣水曹篇  
歸計生前恨迢迢憶范陽長江畱伏驥瘦句抵鳴凰醉  
酒苔痕溼懷歌暮影涼不愁千載寂遺愛尙蒸嘗

胡步雲

亂山圍四野千載一墳孤夜雨暗榛莽春風叫鷓鴣文  
章多阨運官職亦窮途展拜愁何限吟魂識我無



生爲韓孟友死結少陵緣宿草孤城畔新阡二月天妙  
才原是佛瘦句合稱仙寂寂松楸冷蒼茫起暮烟

李光緒

明月長江閱古春空山寂寞對荆榛推敲若更尋閒句  
文冢書臺好結鄰

瘦盡詩魂尙有神參軍明遠是前身殘碑絕勝房山記  
巖壑爭傳風雅人

厲之鏗

細路平岡斷壁隈手摩殘碣拂蒿萊不因瘦句推敲出

安岳縣志

卷六

古蹟

八

誰識長江簿領來奪卷官求人屬秀祭詩只合自憐才  
千秋名士薶荒草落日鷓啼首重回

邑令 朱雲駿

竹寒沙碧水之涯抔土安泉歲月賒憑弔至今悲瘦骨  
幽棲終古傍僧家危亭雨助哀猿嘯深塢風吹鼓子花  
尙友崔生葬明月悽悽同調不勝嗟

邑令 朱琦

偶遂澹泊遊縹馬城西路山風颯已秋葉落寒原樹中  
有詩客魂千載寄霜露斯文孟郊匹瘦格吳僧慕已畱



身後名無爲嗟不遇應有李洞碑蒼茫不知處

王應鵬

池邊仍夜月木末更秋風縱使吟能苦難教句愈工逃  
禪非佛子謫宦是仙翁除卻寒郊外詩名孰與同  
瘦詩亭在賈島墓前詳邱墓

寄題瘦詩亭

學使 吳省欽

風樹灑泠泠孤雲落葉青殘齋僧入定苦咽鬼通靈徑  
古畱樵蹟祠荒剝蘚銘乾坤容偃仰長配浩然亭  
白紵青山曲高墳小謝鄰生前徒病婦葬處自遺民尸

安岳縣志

卷六

古蹟

九

祝名猶忝風騷旨可親最憐京兆尹冠蓋沒蕪榛

邑令 洪成鼎

迹往詩名在祠傾蔓草侵逃禪原偶爾作宦本無心寒

瘦媿東野推敲重藝林秋風吹豕樹彷彿聽孤吟

瘦詩亭銘

邑令 徐觀海

露草團綠暮山送青維此抔土有唐詩人詩魂何依曠  
然茲亭黃金鑄之以妥其靈

瘦詩亭記

學使 吳省欽

當塗青山之北有李白墓南即賈島墓鄭谷詩有云幽



魂應自慰李白墓相連者也賈爲范陽人李東陽弔之有百里桑乾繞帝京葬來詩骨青山瘦之句是房山賈島峪亦有墓焉乃其卒於普州葬於城南安泉山具載蘇絳所爲墓志李洞則曰旅葬新墳小釋宏秀則曰死葬蜀山根賈墓之在安岳無疑也墓域今尙無恙錢塘徐君觀海以郡丞攝令是邦封樹展謁復結亭於其南名之曰瘦詩而乞文記其事按新書賈初爲浮屠名無本韓愈教其爲文遂去浮屠舉進士不第韓集有送無本師歸范陽詩作於元和六年辛卯之冬以會昌癸亥

安岳縣志

卷六

古蹟

十

賈卒之年記之賈時年三十有五而嘉話錄言賈於馬上鍊句不覺衝韓尹第三節韓尹京兆在長慶癸卯與賈相識且十餘年安得有衝節被擁之事若摭言言賈騎驢吟落葉滿長安之句唐突京尹劉栖楚被繫一夕始釋與新書較合而劉尹京兆在敬宗之時島年且五十其事恐與劉無與也至遺史言無本居法乾寺遇宣宗微行於賈案取詩卷覽之賈攘臂奪去旣而知之亟謝罪乃除長江簿摭言又言賈遇武宗於定水精舍尤肆侮慢武宗訝之授長江簿宣宗嗣位在賈沒後三年



而武宗卽位之初賈已簿長江惟文宗常患進士浮薄落第授簿容或有之宜新書以謂坐貶蘇絳以謂罹謫也夫賈之詩特詩之一體賈詩之瘦特賈詩之一體韓詩一稱其勇再稱其狂由怪變而造平淡雖其行諛政事無可傳而遺墟綜於地志佚事錯見於他說樵悴專一不得志於時之士可聞而自振焉矧學道愛人以經術飾吏治其儒雅風流爲後賢所企慕者當何如也吾是以樂徐君之所爲而勉其所可至者有以信今而傳後云

安岳縣志

卷六

古蹟

十一

重新瘦詩亭竝建坊跋

邑令 裴顯忠

亭爲舊令尹徐君觀海刼建年久傾圮不特址蕪荒草閒卽水影山光亦爲減色甲申秋余來攝縣事偶一登臨輒徘徊太息不能去爰鳩工庀材重葺之柱易以石瓦易以甌期久遠也環植竹柏雜蒔花木助詩興也因思賈詩之瘦不藉亭以傳而世之文士騷人慕其名而拜其墓者未必不因有亭而慨然興起也

工部樓卽南樓在城南世傳唐杜甫嘗教授其上故宋人有南樓絃誦之句



陪章畱後宴南樓詩

杜詩註此乃梓州作茲照通志載入杜

甫唐

絕域長夏晚茲樓清宴同朝廷燒棧北鼓角漏天東屢  
食將軍第仍騎御史驄本無丹竈術那免白頭翁寇盜  
狂歌外形骸痛飲中野雲低度水簷雨細隨風出號江  
城黑題詩蠟炬紅此身醒復醉不擬哭途窮

夏夜登南樓

唐賈島

水岸寒

一作閑

樓帶月躋夏林初見岳陽溪一點新螢報

秋信不知何處

一作樹

是菩提

賈墓杜樓序銘

明戴敬辰古昌

安岳縣志

卷六

古蹟

三

碑銘者識其事以徵來也然荒草斷碑亦或不永故必  
求名人之文以識之唐詩人賈浪仙墓在城南二里予  
具牲醪往拜之碑皆仆地漫漶不可識獨於邑乘見康  
六庵先生之文予讀之擊節嘆賞因問先生曰賈碑出  
自椽筆為時幾何而碑已剝落獨先生之文在耳名人  
之文永於石良不誣已予愧無金石之文而又不忍賈  
墓化為烏有倘後有風雅韻人求其處而不可得我輩  
寧追其責乎予嘗遊樂至湧泉寺見灌莽中一小碑浪  
仙絕句也意浪仙入省會常托宿此中三復之令人歛



歔憑弔竊笑樂邑遂無一有情人護持此碑者予不欲復爲後人笑也因與邑倅江舜升先生取形家羅經登墓討之墓背山面水坐丑向未子方有石壁迤邐至墓可三十餘步前至毳簷可二十步穿心橫互有界牆可五十步耕牧樵蘇有禁舊祠荒廢梯階遺址猶存遂勒銘於壁俾後有所考不於碑而於壁夫亦愈於碑之遷徙不常耳衡山碑岐陽鼓有神物呵護此夏禹周宣一片精靈充塞萬古皆二君之自爲神豈別有神物乎浪仙詩瘦而神壯直衝馬頭千古如在是壁固永於碑而

安岳縣志

卷六

古蹟

三

浪仙之神又永於壁則予與江君姓氏或亦借浪仙以長存也又城南街心中一小樓小水穿其下相傳爲杜少陵讀書處也題額碑銘俱無之亦爲缺典二公雖後先遞起然皆唐之詩人也其神或相往來附記於此當亦不惡合銘之曰浪仙之骨藏於此噫少陵之蹟畱於彼噫二公營魄長不死噫萬有千歲是其爲風雅之里噫何處非并州也噫崇禎庚午插莢日記

工部樓

明黃承曾邑人

子規啼破月明空萬結幽懷蜀道中瑄相不容難近日



巖侯有意自生風儘教漫草侵蘭畹誰採雲芝入藥籠  
光焰文章千古照閒將書史課南雍

明 康紹祖 邑人

當年匹馬去長安豈爲風塵早挂冠日月浮雲遭障翳  
江河宏抱受摧殘無端蹤迹隨蓬轉不朽文章作斗看  
百尺危樓神自護故將遺韻馥南關

國朝 王應鵬

蜀都爲客五經秋清宴何年到普州鴻爪偶遺千古跡  
忠肝空結一生愁承祧華胄絲堂構

金匱杜少尹  
重葺此樓 點筆

安岳縣志

卷六

古蹟

古

騷人競唱酬賸馥殘膏沾丐遠欲窮佳興且登樓

讀易洞在治西三里大雲山詳流寓李洞傳按讀易洞有  
二一爲彭乘讀易之所卽今翰林洞其一卽此

郡守 張松孫

大雲山上白雲飛忽凝忽散迷翠微暮靄蒼茫入殘照  
赤霞璀璨臨朝暉氣象萬千望難盡屐齒不疲如相引  
引至林壑深邃處李洞幽居迹未泯羣峯洞外列翠屏  
繞階松樹森青青紅塵隔斷千巖外獨面石壁參義經  
曾憶亂離來隴右數奇何異邁陽九一朝得事賈夫子



同人于野頰肯首遂悟一真息萬緣人蹤絕處孤詣專  
水流花開天心見誰將寂寞說空山

朱雲駿

高隱千秋溯白雲先天奧旨闡義文仙蹤縹緲玉泉院  
故里往來鸞鶴羣句漏丹砂求不遠韋編皓首愧無聞  
一泓池水源頭活從濬心靈滌垢氛

翰林洞上頂東城牆下臨岳陽溪傳爲陳希夷所鑿宋天  
聖中彭乘知普州政暇嘗讀易於此詳名宦彭乘傳

明  
王守貞

安岳縣志

卷六

古蹟

五

古洞何年鑿遺基屬野堂雨聲牀滴翠烟靄草浮光徑  
直通寒壑山深空夕陽讀餘經幾卷千載尙遺芳

楊思震

前修遺蹟後人看此地乾坤若箇寬溪上清光山月白  
座中蒸氣洞雲寒流觴有興蘭初茁點易何年露未乾  
卻愛東風行處好拂衣贏得漫觀瀾

葛仙井在治東南雲居山葛仙翁煉丹所井猶存見山川

〔通志〕真相寺有葛仙井〔按〕葛仙名洪字稚川丹陽句容  
人其從祖元善煉丹得仙世傳爲葛仙翁洪受煉丹訣



於元之弟子及鮑元等人亦稱爲仙翁晉史言其求爲  
句漏令終化羅浮外史復稱其自句漏入蜀取雄黃於  
武都山尋入洪雅花溪巖洞中道成白日上昇隱迹猶  
存職方圖志云稚川煉丹之所在天下十有三此豈所  
云十三之一耶抑亦葛元煉丹之所耶又漢劉向列仙  
傳葛由羌人也周成王時騎木羊入西蜀上綏山綏山  
在峩眉山西南隨之者不復還皆得仙道由亦見干寶  
搜神記事同又新唐書王勃傳劍南有葛瓚山方輿勝  
覽彭州葛瓚山葛仙翁瓚於此上昇以上二人亦有葛

安岳縣志

卷六

古蹟

六

仙之稱特附錄以俟考

明陶允邑人

藤蘿交映莫知年仙侶遺蹤尙宛然蟬脫舊衣畱石室  
瀑飛靈水湧金泉碑書故事生苔蘚池浴真圭鎖翠烟  
薄暮松巔聽鶴唳猶疑髣髴是神仙

黃思烈邑人

真人種滿白榆霜贏得塵寰膾舊芳藥火不燒丹竈冷  
石牀空帶野花香斷崖字古荒春雨峭壁雲橫鎖夕陽  
我欲編茅修往事養心何必借金光



希夷池在治後陳希夷植蓮其中宋彭乘復為修鑿一名方池

希夷池

明楊廷儀吉水人

一區重鑿繼希夷賢守猶存去後思尚有清風迴鐵嶺  
豈無明月照方池涼生水面涵秋色香引蓮花入酒卮  
莫道古人遺澤遠百年夢想亦襟期

王守貞

方池多景趣烟雨老蒼苔碧湛波心月青浮水面臺清  
光寒激灩素魄夜徘徊池上臨風晚還宜金谷杯

安岳縣志

卷六

古蹟

七

洗墨池在城南傳為劉文龍洗墨之所水有墨色

弔先喆劉文龍洗墨池詞

明李有成

悠悠喆人維家之楨東嶽凝其骨幹南水濯以精英瑩  
瑩松神孕於何所煉於何始韜成珠璣灑成波瀾石餐  
之而五色魚濡之而赭額墨之所遺厥有聲詩厥有賦  
詞厥有規頌美刺以陳功德胡不永垂典纒為後人則  
池之所葺厥有堂宇厥有誌銘厥有門廡路道以通翫  
賞胡不永垂模範為後人瞻古方伯湯於此誦其詩讀  
其書說者謂此水三年而一清先生三世而一生湯公



無乃現先生之異身孝廉方於此寢其魂藏其骨說者  
謂生必有人以表揚之歿必有神以呵護之方公無乃  
佐先生之修文先生嘗飲我以瓊漿示我以筆證維普  
多材維運陽九百世而下其誰能不思先生天不泯先  
生啟司岳者欲志以碣旌以額先生倘隱隱含笑於帝  
京噫嘻昔也勝概今也溝洫瀑瀑文源孰塞之昏詩云  
池之竭矣不云自頻悠悠喆人實勞我心

釣鼇臺在城南三元隄下翰林洞上有釣鼇潭中產巨鱗  
上垂柏如綸近水若釣鼇狀明邑令李奇英築臺其上

### 安岳縣志

#### 卷六

古蹟

六

國朝邑人譚言藻書刻釣鼇臺三字

釣鼇臺垂柏詩碑 有序剝落

岳陽風景真雄奇秀柏清芬徧地宜水媚山輝靈不闕  
挺生怪物光琉璃孤根拔地蛇蟠狀曲折盤旋神欲王  
陵厲丰姿霜雪飛摩空氣聳雲霄上偃蓋藏靈舞翠微  
坐當巖石烟霏霏陰濃雨露搖金莖萎薊如綸垂石磯  
磯頭一水連洙泗多少魚龍潛水戲唾掌相持釣巨鼇  
拍天霖雨遐陬暨霖雨降施嘗灑灑深減寧極地天老  
羞同競豔學天桃盲效隨風鄰弱草天桃弱草閒生意



朝有榮兮夕有瘁何物亭亭獨似君一腔矯矯春秋易  
春秋幾易混囂塵點翠紆青且效顰雅德萊公堪比擬  
後彫宣父歲寒論古榦青柯今鬱然亭亭閱歷萬斯年  
莫云材大難爲用撐住西南半壁天萬厯己酉秋仲吉  
知安岳縣事滇西太完子李奇英漫書  
是碑乾隆四十九年二月在釣  
鼇臺側菘圃中掘出已折兩截其草書  
宛然伯英遺風惜小序剝落蒐考無由

釣鼇臺

明徐慎

陽溪九曲繞鬢宮舟載金魚柏植豐直榦凌雲棲瑞鶴  
游條逐浪落長虹碧鱗奮翼須筌獲玉水迴瀾聽餌逢

安岳縣志

卷六

古蹟

九

棠蔭三年成勝蹟許將鼇客對神驄

黃承中 邑人

龍山靈異產洪材青鎖玲瓏下釣臺風送枝頭金線舞  
月浮水面玉鉤徘徊柔條不共凡菲老曲榦須和碧浪開  
騰躍巨鼇憑釣繫敢云大地莫栽培

[按]以上賈島墓工部樓讀易洞翰林洞葛仙井希夷  
池洗墨池釣鼇臺舊志謂爲八景前志八景中無賈  
島墓有流杯池

流杯池在城南岳陽溪溪皆石宋彭乘鑿爲池曲水流觴



每歲效蘭亭故事因名

明顏公輔

勝日乘春出講帷  
乘蘭修禊繼當時  
馬銜金勒空羣駿  
人倚雕鞍入畫奇  
柳鞦舞筵絲拂袖  
花飄曲水酒盈卮  
龍圖樂事今云遠  
吟對東風有所思

明王守貞

爭說蘭亭趣何如此境幽  
滌洞波湛碧唱和酒隨流  
春雨寒溪釣夕陽荒草洲  
彭公遺德在醉客漫歌謳

三亭名勝志普州三亭曰均逸曰東溪曰碧厓

安岳縣志

卷六

古蹟

三

均逸亭

宋梓州人文同字與可

亭宇跨城端新苔磴道盤  
風光晴水石烟景暮林巒  
簿領仍多暇賓從每盡歡  
何由掉塵鞅聊問借闌干

東溪亭

文同

短笻透迤渡高欄天矯沈  
波光環堵靜日色繞梁深  
萍荇翻金鯽蘭茗起翠禽  
主人公事簡時此照清襟

碧厓亭

文同

斷巘綠溪邊危亭翠壁前  
軒窗來是客詩酒自稱仙  
遠壑春藏雨長波晝起烟  
吏人休報事高興正陶然



丹竈在縣東南真相寺相傳陳希夷煉丹處  
玉虹閣在縣治內宋建

琴臺在治北卽北山橫琴

達觀亭在治西鐵峯山神祠前

達觀亭記

明楊思震

嘉靖辛丑秋九月鐵山神祠成乃復於祠前建亭以備  
遊覽先是鐵山之上有二祠一曰福濟以祀隋將姚萇  
一曰普應以祀宋儒多岳按姚公長安人也仕隋被命  
都統討平普瀘昌之亂擢刺普州卒於官而家於普焉

### 安岳縣志

#### 卷六

古蹟

三

後人追慕而祠之宋嘉定中紅巾入普復著神異賊乃  
就擒國初詔封之入祀典多公天彭人也宋初以文學  
名厭孟蜀之僭隱居弗仕乃傳經於普普人被其教者  
科第接踵遂爲名郡及卒牟袞諸徒葬之於此因立祠  
焉歷世旣久普應以兵燹頽福濟以前令徙於是鐵山  
濯濯孤立邑之士夫恆以復興祠宇爲言嘉靖庚子秋  
予嘗給疏於僧淨表定祥使經營之而未就緒今年春  
遂寧尉坤莊李君守維視篆於此方事祈禱而士夫以  
是言之亟使義士周洪簡于球董其事復募二僧以相



協夏五月建祠四楹以奠神位左姚右多合而祀焉且將以爲祈禱之所逮八月終安岳少尹陳君雪莊蓮幕周月山俱自述職還復立亭宇六楹於祠之前爲門爲道翼然壯觀落成他日坤莊以公務至與雪莊月山暨予同寅北園墨子稱菴官子偕雲溪子登斯亭而賞焉霽宇寥廓清風徐來山水閭閻豁然在目諸君曰美哉象乎可以觀矣雲溪子曰吾聞之天下有大觀焉傳曰觀乎天文以察時變觀乎人文以化成天下衆人昧之而君子達焉夫君子之道先內觀而後達之以觀物是

安岳縣志

卷六

古蹟

三

故君子者正心誠意以純乎其天恬然而無物者也太宇定而天光發則所以返觀於虛靈之中者優優乎六合同春而八荒我闡於是乎以之而觀物焉則夫萬形萬有皆吾心目之瑩然者是故觀於雲漢而天象昭矣觀於山溪草木而形勝昭矣觀於閭閻之輻輳而人文躍如矣君子泛觀而得之於心道其在茲乎然猶有切於是亭者吾聞姚以武著多以文名亦莫不有君子之道今之宮牆甲第磊落於亭之南者修文之地也君子觀之其有以追多君之遺澤乎旌旗圖陣布列於亭之



北者演武之場也君子觀之其有以追姚公之英烈乎  
是則君子之觀不徒聲色象貌而已也樂天者自強法  
地者達順窮致人物者慎動振文教者成能崇武功者  
激義夫激義則保障修成能則人材出慎動則可賢厚  
德則可大自強則可久故曰道其在茲乎諸君曰善乎  
是亭也可以觀矣因名之曰達觀亭

桑棗園明凡二十有一一在養濟院之東今爲邑厲壇其  
在二十鄉者鄉各一今俱廢

漏澤園明有二一在高石橋之北一在縣治北三里今俱

### 安岳縣志

#### 卷六

古蹟

三

廢

春風園在治東文昌宮前邑令劉有儀建竝書刻綠柳長  
堤四字

安岳故城卽今治輿地紀勝縣舊治在鐵門山宋開寶四  
年移今治宋志普州淳祐三年據險置治寶祐以後廢  
元末復置安岳縣明洪武四年於縣置普州九年仍併  
爲縣

國朝省縣入樂至雍正七年復置

隆康廢縣在縣南五十里後周置永康縣隋開皇十八年



改曰隆康屬資

一作梓疑誤

陽郡唐屬普州元和志縣北至

州七十里後周建德四年置隋改隆康唐先天元年又

改曰普康舊唐志本周永康縣隋改永康移治伏強城

尋改隆康寰宇記開皇十九年移治尋又改名宋乾德

一作熙寧五年省為鎮入安岳

多業

前志誤作業

廢縣元和志多業縣隋開皇十三年易為普

慈按普慈本即多業前志舊志俱謂在今茗山鎮樂至

縣志所載歧而為二道里各殊通志沿革亦入樂至均

誤

### 安岳縣志

### 卷六

古蹟

一

石羊廢縣在縣東一百里舊曰石羊鎮元時置縣明初廢

崇龕廢縣元和志縣西至普州一百十里隋開皇三年於

此置崇龕鎮大業十二年於鎮置縣先天元年更名舊

唐志本周隆龕城隋置縣舊治整瀨川久視元年移理

波羅川按崇龕廢縣今在治南九十里象王山古龕寺

現有古跡可考通志因九域志云乾德五年省為鎮入

安居以遂寧有安居坝銅梁有安居鄉遂竝陳搏故宅

兩縣歧載均誤

陳搏故里在崇龕廢縣輿地紀勝在崇龕鎮去鎮二里宋



初卽其宅爲靈山觀宣和中賜額曰欽眞

歲暮采藥經行普州道中感圖南老人故墟把酒酌

於其社悵然書懷二首

明任 瀚 渝人

谿喧岸坼津樹黃谷日射樓衣擣霜我行采芝歲月遠  
念子不歸關塞長供張卽炊犀浦石翻飛欲跨綏山羊  
瑤草芊緜空憶汝故城鸞鵠紛相將

易數鋪張賴有君何山石室鎖靈文可憐故國空黃葉  
曾向新朝出白雲种放傳經皆自許羲皇絕學好誰聞  
竭來領略河圖意鑿破乾坤掌上分

### 安岳縣志

#### 卷六

古蹟

三

金石

梁招隱寺刹下銘通志略蕭綸書普通二年在普州

唐棲崖山寺讚銘序碑目考唐開元戊辰前刺史楊珪崔  
克讓及房公立失其名今剝落

唐老君應見碑碑目考唐開元觀老君應見碑開元二十  
九年岳陽郡奉勅建宋淳化二年重鐫

唐紫極宮碑碑目考集古錄云唐樂闡撰賈島書樂彥融  
篆額卽唐明皇帝祠也樂又重修碑以會昌元年立在

普州



唐西崖禪師受戒序碑目考普州刺史韋忠撰開元十年  
建

唐宣宗賜浪仙墨制今亡

賈浪仙墓表見前賈島墓

蘇絳賈島墓誌見前賈島墓

唐真相寺李時雍龜鶴二字明嘉靖二十一年重鐫

真相寺重刻磨崖古字記

嘉靖壬寅冬余出巡至安岳公暇因遊雲居山山有真相寺寺後峭崖開數洞洞各有佛并觀音像皆唐造雄

### 安岳縣志

#### 卷六

金石附

三

偉古雅今匠氏萬萬分不能作由此轉南洞差小像亦皆小又轉而西磨崖刻龜鶴二字週圍幾丈許末唐高陵李時雍墨跡華陰楊令式磨崖減筆精絕近世所無第以歲久爲好事者多搨搨本半至剝落余命縣學教諭楊子思震臨之崖傍又磨一方復刻於上存此半跡者使好古君子得以考古云東峯上有陳希夷丹竈丹井蓋浸浸向湮沒矣將同思震指示宋馮山遊寺詩余卽席和之附此併刻明楊瞻記

聶公真龕記碑目考在雲

誤

居山軍事判官何光遠撰廣



政四年建

陳希夷自贊碑洪武甲戌秋九月重陽日邑迪功郎縣丞  
陳觀重建

贊云

一念之善則天地神祇祥風和氣皆在於此一念之惡  
則祇星厲鬼凶荒札瘥皆在於此是以君子慎其獨

宋白麟淨慧巖銘

淨慧巖石像序銘

宋白麟

淨慧巖者唐乾元中僧舍也歲月深遠莫知其詳迄今

安岳縣志

卷六

金石附

三

僅四百年舍宇既頽而巖前石像亦斧鑿矣獨山巖草木與古無異處士趙慶昇飄然有山林之志乃於紹興辛未勅室巖畔與木石居既又鑿山骨剗苔蘚再修石像飾以丹青石室帡幪可庇風雨釋氏風致煥然於松石之間乾元之迹於是乎不亡矣銘曰士之履道若巖石然歲月弗治莽蒼芊緜維心與迹其勢若聯一或弗淨斯罔覺焉君子有見端本澄源世務如脫浩其孤鶩虛靈精瑩乃復其天萬事萬物昭吾目前藐彼金玉塵視冕軒維此淨慧岑寂有年卓哉隱居脫屣翩翩萬木



翦翳一室獨懸乾元之迹庶幾永傳松風清清澗水涓涓無物無我是爲福田

杜氏寶田銘在今同化鄉清流鎮巖壁銘字猶存

寶田銘

宋杜孝嚴

昔我皇祖節範處士實居谿上題於石壁字有十六忠孝二字吾家之寶經史二字吾家之田爲我子孫畱此基銘舊屋改矣谿山自如面谿背山新構吾廬山獻巨壁可以大書仍作斯銘以毋忘厥初銘曰忠孝之寶出爾性天忠不待貴葵藿有尊孝不待富菽水盡歡苟能

安岳縣志

卷六

金石附

三

寶此旣美且安經史之田在爾菑畚種穆是植稂莠是除苦心立志斯爲良圖雖有饑饉必有豐餘光明之山韞玉初露卜築山根寶田所富此山不磨此寶長明此山不滅此田長畊環堵旣新勒山爲銘子子孫孫生生成成

杜孝嚴題清流鎮八景大書於石壁今剝落惟存良巖二字

郡北小千佛院記碑目考普慈志開皇十三年建茗山平寇錄見武事



茗山平寇錄考

治東六十五里折桂鄉有茗山康熙志古碑遺目中紀茗山平寇錄注云載普慈志今亡宋王象之普州碑目亦列其名平者果何寇也讀宋史見紅巾賊張福莫簡之亂入普州屯茗山安丙張威平之平寇之錄亶在斯乎嗣於茗山石壁閒摩挲求之獲磨巖碑記張福事額篆茗山紀功之碑前有序後銘其功二十五章惜文多漫漶撰者姓名竝勒石之年俱損中云辛未擊走庚子全師以歸紀日也非紀年也如屬紀年辛未爲嘉定四

安岳縣志

卷六

金石附

五

年福猶未亂福之叛在嘉定十二年己卯安得有庚子安丙傳云七月庚子盡俘餘黨千餘人與此碑符合其曰父子同功謂安丙及子癸仲也又曰如今日之盛則碑之刻當在嘉定己卯庚辰閒蓋六百餘年於此矣以斯驗之茗山之在安岳無疑也乃省志於遂邑繖山下引輿地紀勝云茗山在安居縣南七十里又茗山鎮嘉定乙卯擒潰卒莫簡於此樂邑志載茗山平寇錄謂不可考吁均誤矣省志復將己卯作乙卯更誤今獲此碑使不爲之糾其失數百年後殘碑磨滅又烏知茗山平



寇之眞蹟乎道光七年冬茗山居人掘得鐵錢甚夥磨  
視其文閒得崇寧大觀銅錢一二其餘鐵錢率皆南宋  
而惟慶元嘉泰開禧嘉定四號尤多理宗以後無得焉  
夫吳曦亂蜀事在開禧中錢何得有嘉定其爲紅巾之  
擾而瘞此明矣余故備考之以紀其實云燕山鄒紹京  
撰

國清寺橋碑前志碑存字晦蝕

元趙孟頫石刻詩在治東南五十里喜井鄉捲洞橋

春陰柳絮不能飛雨足蒲芽綠漸肥正恐前呵驚白鷺

安岳縣志

卷六

金石附

三

獨騎款段過橋西

湘簾疎織浪文稀白苧新裁暑氣微庭院日長賓客退

繞池芳草燕交飛

古墨輕磨滿几香硯池新浴燦生光北窗時有涼風至

閒搦黃庭一兩章

竹林深處小亭閒獨鶴徐行啄紫苔羽扇不搖沙帽側

晚涼青鳥忽飛來

明辛東山廣惠橋題壁石刻詩

蜀道天開險蠶叢地厚生溪山漾竹色江野缺鷗聲



龍臺場側巖壁橫鐫鳳山甲第龍臺達觀八字嘉靖丙辰  
國史楊立洲題生員楊月泉書

安岳縣志

卷六

金石附

三



山川志

西南山水惟川蜀最奇謂陸有劔閣之雄水有瞿唐之險  
爲天府一大鎖鑰也普慈僻處偏隅山雖高而無巖石之  
象鳳凰山其秀極者矣水雖淺而有學海之能岳陽溪其  
流長者矣用能與五岳四瀆同爭鍾毓之靈以開人物之  
盛石蘊玉而山輝水含珠而川媚奚取焉

玉琴山在治東關外俗呼東街山奎星閣移建其上輿地  
紀勝紫微山在州東門外

鳳凰山在縣後突兀兀百仞一名鐵峯山輿地紀勝鳳凰山

安岳縣志

卷六

山川

三

在州治後形如飛鳳延袤數里氣象雄勝普州治據其  
脊明統志鐵鳳山在安岳縣一名鳳凰山

龍泉山在治南關外西自鐵峯南自內江二支會合騰躍  
若龍諸峯環繞山曲如几文昌宮儒學署龍泉書院春  
風園湯公祠皆在其麓

東林山在治北郭外峙立署後龍神祠在其腰塔踞其頂

明王縉紳邑人

重上危峯思爽然酒旗飛影到堦前萬家烟火清秋日  
百里封疆大有年露下芙蓉花半落雲深沙浦雁



暮齡祇有山林好今日相逢一醉便

李思文 隴陽人

鳳山北去有東林林內烟雲互古今萬樹午風翻鳥翮  
四山春雨聽龍吟咏歌不減沂雩趣紅紫都含造化心  
偶為興來閒眺望不知夕照下西岑

雲臺山在治南三元隄上龍泉之右一峯突起如雲

安岳山在治北二里縣以此得名又名多岳山前志作岳  
山舊志作岳陽山

明胡纘宗 隴西人

### 安岳縣志

### 卷六

山川

三

何事日徘徊城中車馬催參差多古木曲折有高臺門  
迴藤蘿護天空雲靄開山僧不解禮停客問何來

琴山在治北里許橫亘如琴

安泉山在治南三里有賈島墓

大雲山在治西五里與鐵峯山連絡延袤聳狹勢若臥龍  
上有棲巖寺唐雍州李洞隱此鑿讀易洞詳流寓宋馮  
山亦讀書於此按大雲舊通志誤作大雪潼川屬邑多  
暖或數年未嘗雨雪也

金羊 誤 山在治西五里上有黃石如羊



雲居山輿地紀勝在治東南與靜居山對峙上有圓覺洞  
葛仙井爲近城遊覽勝地寰宇記在縣南七里

宋馮山邑人

不上雲居二十年春風草色尙芊緜浪誇行跡自南北  
應許遊蹤相後先客爲芳辰浮綠蟻僧於清夜禮金仙  
興來莫說長安夢北斗南辰總煥然

明王鳳

山中古寺石頭路上有貧僧閉了因戰雨龍蛇爭洗甲  
叫雲雞犬看飛身青蓮有社何人會玉版無蓀少客親

### 安岳縣志

#### 卷六

山川

三

指引我來公暇日滿前木落費尋真

鼓樓山在治南雲居之右巖石疊聚如樓

天馬山在治東五十五里石壁陡峻嘉慶五年築砦禦賊  
全活甚眾

龍馬山在治南四十里

香爐山在治南五十里

雲峯山在治東南五十里折桂鄉亦有此峯

宋馮澥邑人

峯上青雲若箇深杖藜攜酒上雲岑此行不負東風意



三十年前抱此心

崔旻

早炊千佛一爐香  
鳥道崎嶇使者忙  
徧野綠雲隨馬過  
一天細雨襯時涼  
菩提烟樹禪摩盡  
蓮葉舟橫詩酒狂  
薄宦數年徒竊祿  
江湖日夜仰吾皇

明楊名

雨餘風日正清清  
山外程途也自平  
樹影不疎禽語亂  
苔痕如洗馬蹄輕  
忽聞鐘鼓相酬和  
卻引袈裟遠送行  
聖主恩深春未暮  
五湖烟雨有新盟

安岳縣志

卷六

山川

三

掛鐘山在治南九十里形如掛鐘

明吳憲  
邑人

有山高出雲悠悠  
勢旁礪下垂若懸鐘  
上聳配喬岳花  
木盡葱龍烟霞淡  
冲漠蹄涔識奇蹤  
鳥林拂清幕我昔  
事遊觀十載猶如昨  
駁厯笑歸田山靈訂  
佳約搔首暢吟懷  
鳶魚共飛躍醉酒謝  
諸君記取山中樂

金魚山在下石溪下高數丈大百圍矗立江心

魚龍山在治東南五十里形如龍眾山洋洋赴之如魚爲

邑中祖山高甲一邑嘉慶五年邑人築砦避賊



明王縉紳

南北登臨此日情司空文明五陵佳氣晚氤氳李頻風吹山帶

遙和雨韓君平客至孤峯淨掃雲皇甫孝常野鶴巢邊松最老

李端竹園林巷鹿成羣盧允言青山盡是朱旂繞王摩詰把酒

相看日已曛

雙山在魚龍山左兩山矗立高若齊雲其右真南鎮王僉

憲李孝廉發焉

瑞雲山邑有二一在治東八十五里長林鄉四壁如削明

末張侍御任學築砦堵賊俗呼張公砦嘉慶五年里人

### 安岳縣志

#### 卷六

山川

三

就此避賊恃以保全一在折桂鄉大月寺與張公砦相

隔十二里

寶珠山距瑞雲山五里上有寶石如珠故名又治東十五

里牛王寺亦名寶珠山見寺觀

五寶山在治東南一百五十里山有水田二百畝五石如

寶昔人曾據避兵俗呼五寶寨

香雲山在治南十五里輿地紀勝誤作五里崖石峻嶒山頂夷廣一

名光照山夜現聖燈有石池水甚甘冽又名梓潼寺按

舊志誤載東坡詩詳後記中



明湯佐 白山

絕勝叢林已徧參此生蹤跡半江南片帆江浦凝清曉  
一錫湖湘挂翠嵐在處風淒香露冷歸來雲護液泉甘  
敲門月下紅塵淨照澈禪心印碧潭

取得如來四大經又看飛錫蜀天青歸無白馬雲間載  
講有蒼龍月下聽美錦千華都是道香風百寶總通靈  
二僧已駕摩騰竺更遣泥牛碧落耕

香雲山記

蜀山經東坡畱題者十有餘獨吾普香雲一絕舊屬傳

安岳縣志

卷六

山川

三七

譌按省邑兩志俱於香雲山載坡翁詩云想是有金丹  
神仙不知祕何事露光芒夜半驚童稚考年譜先生二  
十一舉進士明年歸二十四歲除服南行三十一以老  
蘇憂歸三十四還朝地非孔道胡爲至此自是而梓里  
不復有先生跡矣年六十六卒於常州果何時而灑翰  
香雲歟及讀宋施元之蘇詩註是詩乃先生守高密時  
廬山五詠中聖燈巖一首其廬山在密以盧敖得名竝  
非西江之廬山乃因香雲有夜現聖燈之語遂竄入於  
普何其謬哉然茲山雖未獲先生遊賞而奇峯特出實



異境也山椒古寺中有方池長四丈餘寬深均二丈許  
澄鮮清冽煮茗甘香詳邑舊志明宏治十五年湯佐光  
照寺碑有勅自唐宋盛時宣德間大珠復古制等語惜  
文多晦蝕又嘉靖三十一年陳才記謂大珠爲瀘山人  
初膺鄉薦登進士繼逃名利正統間尋師得無際擇山  
得香雲爰構殿宇名曰光照以二碑驗之山寺係勅於  
唐宋古名光照近名梓潼也其自昔之以香雲名山者  
倘亦因寺前桂樹叢生天香飄於雲外有取於駱丞之  
句而名之歟亦雅矣於是乎記延之鄒長源撰

### 安岳縣志

#### 卷六

山川

三

鄢家山在治南十五里奇峯高聳俯視諸山

白雲山前志在治東二十五里有白雲庵世傳宋遣胡尙  
書訪張真人不遇焚詔於此

麒麟山一名獅子山在治東七十里響灘子嘉慶五年里  
人築砦避賊

大鵬山在治南十六里兩翅峯巒疊起山腰有泉頂有昌  
東寺故址

茗山在治東六十五里卽平紅巾處詳武事按舊通志載  
入遂寧李調元金石考載八樂至均誤



五臺山在治東一百里有古寺今圯

平頂山在治北六十里山頂平夷崖壁險峻嘉慶五年里人築砦避賊

大青山在治北六十里一峯突兀為安遂之界

孔雀山在治東一百四十里世傳有孔雀棲焉土人鑿石象之故名上有孔雀寺報國寺見寺觀

劉天民三元人

晚下萬雲堆靈山一徑開參差慈竹樹隱見法蓮臺禪許元人問經從白馬回滿前皆素業何用叩如來

### 安岳縣志

### 卷六

山川

三

辛東山洛陽人

閒步萬峯堆谷元天象開鸞翔依寶樹鹿馴臥經臺慈竹縈生翠天花散復回西天真可到一帶渡江來

虎山在治東四十五里兩峯屹立盤踞如虎故名

白楊山在治東北層巒疊嶂羅列如星山麓有寶積寺寺前澗水瀑布如鳴琴然

明劉大謨東阜人

薄暮臨山寺燒燈照薜蘿上方畱老衲別院散曼陀法磬凌空遠幽香入夜多擁衾渾不寐清籟滿林柯



峯門山在治東六十里巨石壁立低視眾山隋名雲光山

明  
楊思震

郵亭午夢尙畱醺十里東風度錦村自喜霜蹄空遠道  
不堪野鳥噪黃昏谷棲雲樹陰常合波靜星池影半吞  
向說普南多秀石懸崖絕壁倚空門

聖水山在治北山上有泉旱不涸澇不溢

明  
楊廷鶚

荒山藏古刹勝迹有神湫爲看魚龍穴忽驚風雨秋鶴  
歸紅樹杪人在白雲樓不負來遊興珠簾半下鉤

安岳縣志

卷六

山川

旱

鰲魚山在治北二十里有伏龍土地祠

獅子山在治北五十里有道林寺

宋  
杜孝嚴 邑人

屈曲道林寺突兀獅子峯閒關春樹鳥盤結幽亭松有  
客事佳翫有僧說真空朝陽霽以煦遊興情未窮

三轉山在治北五十二里僧無際修行於此課功三轉天  
明故名

明  
了悟

五蘊山中絕往來六門誰閉亦誰開一庵荒草連天碧



滿座清虛絕點埃怪石接雲充谷口臘梅繞戶自徘徊  
層巒千尺渾如畫展向知音看一回

金船山在治北五十里上有金船寺今廢殘佛下有南宋  
年號

迴龍山在治東北三十五里

明于瀛邑人

迴龍百折度平岡春雨鶯音隱綠楊竹下有人思鳳舞  
花邊與客看蜂狂振衣新候東風暖拭目遙瞻北斗光  
山上曾聞芝可茹許君一枕白雲鄉

### 安岳縣志

#### 卷六

山川

里

崙峯山在治東四十里

五峯舊志作玉峯誤山在治東一百五十里五峯屹立爲邑與大

足之界

龍尾山在治東北五十里

金花山在治南三里秀石疊聚如花

鯉魚山在治西南九十里一名尖山奇峯高聳甲於一方  
帽盒山在治南五十里端偉俊麗有冠冕珮玉之象在三

聖寺下

五龍山在治西二十里五峯蟠聚如龍有真武閣



文魁山在治東十里

牛心山在治東十五里

白蓮臺在治南十里

乾峩山寰宇記乾峩山其山四面嵯峩按輿地紀勝有乾  
艾山在縣南十五里

重石山在治北四十里

大羅山在治北五十里山高頂平俯視諸峯

雲臺山在治南十五里四圍峭壁山頂平夷有水田數十  
畝原屬古砦嘉慶五年里人重築以避賊

### 安岳縣志

#### 卷六

山川

里

雲龍山在治南四十里嘉慶五年里人築砦

清華山在治南五十里四壁峭削嘉慶五年賊衝突數次  
毫無驚潰

大成山在治東南六十里興隆場後舊志世傳孔子經宿  
於此有古碑惜已剝落按大成山之名莫詳所自或爲  
當年建修聖廟之所謂爲孔子經宿於此其謬不待辨  
而自明今山頂有聖水井張道觀

明

王縉紳

清暇攜壺陟大成魚龍相對甚分明晴雲新染畫圖影



舞鶴猶疑霄漢聲陶令百年無外慕子陵一曲有餘情  
山中草色堪爲侶欲問塵寰老此生

香臺山輿地紀勝在州西五里

老君山輿地紀勝在州北二十里相近有鼇魚山按茗山  
鎮亦有老君山

北壇山輿地紀勝在治東二里上隆而平有壇之象相近  
有走馬山

碕子山在治西七十里共有古碕十八處

寒坡嶺在治東八十里

安岳縣志

卷六

山川

三

金銀坡在治南二十五里

分龍坡在治北三十里

梅花嶺在治東一百二十里

良巖在治南六十里清流鎮名勝志良巖試禮部尙書杜  
孝巖嘗書良卦象辭於其上

西巖卽棲巖見寺觀

淨慧巖在治南七里卽宋白麟銘處

五塊石在治西南五里彭翰林墓山之頂有石碁列惟五  
翦刀石在治南十里寶相山脈之岡兩石相合形如翦刀



馬蹄石前志在治南八十里掛鐘山左有石上馬蹄跡十餘樵人鑿去旬復合世傳張桓侯提兵過此

隄江石在治南八十里三聖寺黃珏里居金魚水口橫互如隄在黃氏祖塋前一里

印星石在治西十里蟠龍山右有石方巖若印

龜蛇石在治南一百二十里金山寺旁有二石狀如龜蛇上刻詩有嶺雲迷樹色山鳥亂蟬聲之句

巫龜石在玉溪書院之左背負龜形以占晴雨甚驗

虎巖洞在治南五十里宋杜孝巖讀書其中題有飛來三

### 安岳縣志

#### 卷六

山川

器

#### 峯四字

華巖洞在治東一百里洞橫直四丈許高三丈見寺觀

天然洞在治南三十里洞橫十丈直七丈許不經人鑿故

曰天然

圓覺洞見寺觀

白塔洞在治南七十里

三仙洞在治東七十里見寺觀

朝陽洞在治西五十里周遭約十丈餘高丈許如覆釜形中有泉井冬溫夏涼里人以水氣蒸潤高下驗雨之大



小明邑令李奇英題曰朝暘仙境

岳陽溪

即青竹溪又名龍溪

源出治西南二十里朱家坪天台山澗

中北注香雲山麓又東北注城南三元隄環帶學宮濼

繞全治又東北注至柑子埧鴛鴦溪會紅土溪水西來

注之又東北注至桂香橋螺漩溪水南來注之又東北

注長河埧又東北注至方家埧苦竹溪會通賢溪水北

來注之又東注姚市鎮又東北注遂寧縣雙河口會魚

龍溪入於安居達於涪江

通志江源云安居東南來有魚海河自安岳縣來會明史

地理志云岳陽溪下流達於涪江賈島詩人自岳陽來則溪之名遠矣

# 安岳縣志

## 卷六

山川

巽

鴛鴦溪在治西二十里水自樂邑西來注於鴛鴦舖又

北有小溪水自天台來會故名又北注至柳溪橋會紅

土溪

紅土溪在治北十里發源雲台山北注鹽井溝又北注

七里橋至柳溪橋鴛鴦溪自西來會又東北注陶岳埧

又東注李官埧與苦竹溝小溪會又東注紅崖觜其土

色獨赤故名又東注至柑子埧入岳陽溪

螺漩溪在治南十五里發源聚寶溝東北注馬家場又

北注米市鎮又北注螺漩灘水漩如螺故名又北注石



橋鋪至桂香橋入岳陽溪

苦竹溪在治北二十五里發源莫家溝僧無際種苦竹成林故名東北注龍橋又東北注至五龍橋入通賢溪通賢溪在治北四十里發源豹子溝東北注龍家坦與石鼓河小溪會又北注通賢場中又東注至五龍橋苦竹溪自西南來會又東注至方家坦入岳陽溪

魚龍溪有二源俱出治南五十里帽盒山西北注魚龍山麓又東北注流湖鋪又東北注至偏巖子罐子河水南來注之又東北注龍臺場至茗山坦龍歸溪會雙溪水

安岳縣志

卷六

山川

巽

南來注之又北注至王家坦東溪水西來注之又東北注至遂寧縣雙河口會岳陽溪入於安居達於涪江壘山溪在治東五十里羣山壘聚二水流繞經入魚龍溪

罐子河在治東六十里發源陳家場北注至自生橋與魚龍山下小溪會又東北注雷響坦又北注至偏巖子入魚龍溪

龍歸溪在治東南七十里發源白塔寺北注高橋又東北注至響潭子上會雙溪



雙溪在治東八十里發源孔雀山澗中西北注石羊場  
又西北注瑞雲山麓又北注至雙溪舖與一小溪會帶  
二水之雙流故名又西北注至響潭子上龍歸溪自南  
來會又北注至茗山埧入魚龍溪

東溪在治東四十五里發源虎山下東注至王家埧入  
魚龍溪

清流溪源由治南二十里朱家坪分派南注清流鎮又東  
南注天林場達於內江

下石溪源出治南一百二十里磴灘東注李家街又東南

### 安岳縣志

#### 卷六

山川

七

注石門廳又東南注圓埧場達於內江

化龍池在治南關外三元隄上

石井天池在治南六十里古稱井水清而鳳鳴池蓮開而  
龍化水不常清蓮不常開

龍泉井在城南龍泉山下以山得名冬溫夏寒

破石井在城南鐵峯山下純石鑿成近西一罅到底乃以  
破石名之其水清冽相傳陳希夷相地所鑿

東井在治東一里泉味甘潔雖旱亦溢

蕭氏井在城南一里世傳劉文龍妻蕭氏微時常躬汲於



此故名

觀音井在城西一里東林觀音閣下

龍王井在城北龍神祠下

仙井在城北一里

聖水井在治東南六十里大成山絕頂

滴水井在治南八里水自巖穴流出不竭

涼水泉在治南十里水出巖下灌溉一方

釣鼇潭見古蹟

響水潭在治南二里卽岳陽溪上流上下皆石水觸之其

安岳縣志

卷六

山川

巽

聲如金如鼓其洩如倒其澄如沚

三龍潭一在治西七里梯雲橋下一在治北四十里九嶺

岡前一在治東流湖鎮兩岸有石小洞洞中有鴿數百

巢焉或曰此昔龍化之所

二郎潭在治南九十里清冽數丈許上有李冰廟遂名之



隄堰志

李冰鑿離堆文翁穿湔泐水利遂開安岳縣互數百里高下下隄堰不一非因人之力卽乘地之利有資之以溉田畝者有假之以培風水者有恃之以正疆界蓄蒲魚者嘉慶間蔣督部堂飭示通省築隄修堰以備旱潦其爲民計者深遠哉

三元隄在縣治南門外有巨溪環學宮溪水逼近城腳乾隆四十二年古隄傾圮南北崖俱泐有三元隄三字蓋經前人修葺者屢矣邑令徐觀海捐俸勸輸得金若干

安岳縣志

卷六

隄堰

巽

劬土鑿石踵其遺址而新之其上下深廣尺寸如舊式名亦仍其舊至道光時邑令龔聯輝增修盈科迎恩二隄竝補修加石磴焉邑人汪時儁書砥柱石三字於盈科隄下

重修三元隄記

明 楊思震

鶴汀李侯之作泮宮也諸生請曰龍山形勝係於一溪然而溪水之流滔滔汨汨徑而遂焉昔我宋守彭公嘗作之隄蓋瀦水以儲秀也我先師顏公又從而築之今旣圯矣而遺迹存焉茲欲卽故址而復爲之俾風氣於



是乎聚也可乎侯曰然是古辟雍之象也乃伐石以甃之凡五月而隄成或曰動者水之常也故智者樂之今障而使靜無亦反其常乎予曰易有之時止則止時行則行神其機則妙而不窮執乎器則滯而不化故動而靜焉靜而動焉而後形而上者之道章矣然則水之動也不有所不必動之理以神於其中乎吾嘗卽是隄之成而有以得仁智之道是故時乎一鑑方涵萬象澄寂山漲弗至清影沈浮百怪潛形遊鱗自得茲則景物咸若天機躍如君子觀之固有以乘其至靜之趣以藏以

安岳縣志

卷六

隄堰

辛

修而天理之機豁然自形者矣其或雲行雨施眾流斯匯源泉混混盈科必行而又蛟龍出潛春濤奮起浩然東之勢不可遏君子觀之固有以得其至動之機奮迅激昂而朝宗之心浩乎莫禦者矣夫天下之理莫不猶乎水也而得其靜者爲仁得其動者爲智君子養至動之理於靜而體以立推至靜之理於動而用以行一靜一動交而仁智之推於是乎不窮矣予觀李侯爲政體仁用智故達之而爲是隄有以哉諸士子之於平日嘗優游於仁智之域而涵泳聖涯且於是乎遊焉寧不有



以啟其本然之天而况毓於其秀以成乎其身飄然於  
充養之後以推致乎文章政事之用者孰非此理之運  
乎隄在翰林灘之上疊石爲之深廣皆丈餘而屹然跨  
溪則十丈有奇其礮密鞏固蓋二倍於昔與鐵峯龍橋  
流杯池讀易洞諸形勝之區上下相望李侯之功確乎  
其可久也以其爲士子發身之所故名曰三元隄

重修三元隄記

明孫科

嘗謂雄廟貌之偉觀者恃垣翰之巍峩儲人物之奇傑  
者藉山川之帶礪理信然也安岳學宮遷踞龍山環而

安岳縣志

卷六

隄堰

三

圍之者宮牆計百有餘丈文廟前溪水滌流先是渙而  
不聚積石以瀦之謂翁受之足以發才也名其隄曰三  
元嘉靖十八年先知縣事李湖因舊址伐石而甃之者  
也歲久水漲傾圯大半觀者興嘆焉癸丑秋七月適黎  
侯被命牧普謁廟畢登堂進多士而講習之已而見宮  
牆頽塌卽鳩工修葺之仍爲垂久之計比度尋丈覆蓋  
咸用石俾不朽也繼躡斯隄見其圯甚爲愀然思曰惜  
哉此隄之不堅無惑乎科目之不多得人也夫水惟環  
鎖斯有以鍾英而毓秀學苑居民有隙地可決之以迴



水勢且盤曲面學形擬腰帶遂捐貲以贖之民樂從諏  
吉興工丁夫子來僅踰月而落成由高及深皆石爲之  
長十有餘丈廣丈有餘尺鞏固倍昔凡跡斯隄者咸知  
侯爲蓄才計也匪勞百姓也同寅陳君遂鷓羅君大倫  
率庠員龍騰遠等屬科竝紀其實焉夫是績也創始於  
昔而充拓於今創於昔者不知其凡幾年則其興於今  
而功之垂於後也又不知其幾何年矣故睹數仞之宮  
牆凡士之得門而入者未必不由階而升值氣運之翕  
聚凡士之盈科而進者自可以成章而達期以仰副德  
茲不槩及

重修三元隄記

郡守

沈清任

安岳縣志

卷六

隄堰

三

意可也侯名文煥字用晦號相亭長沙人登丁酉鄉薦  
初授福建清浦令以守正不阿調茲邑其他績業尙多  
三元隄在安岳縣小南門外縣以山爲城分山成溪以  
溪之曲折蜿蜒也舊名龍溪又名岳陽溪迤南爲學宮  
溪形環宮牆若頰壁常日淺塞山水陡發則浩淼無際  
水去仍污萊前之宰斯土者以此溪秀潤可以輝映文  
教也登石瀦水命名爲三元隄始於宋守彭公修於明



代顏公又修於李侯又修於黎侯皆爲文載在邑乘自嘉靖以後迄今垂二百年隄久傾圮間有爲橋以益行路者亦圯於水而遺址存焉吾同邑友袖東徐司馬莅官隆康於縣之北山首捐金建龍神祠凡益吾民者次第具舉復以紳耆之請劬土鑿石重新此隄乾隆戊戌春三月余以公事來縣適隄未葺工迺得同觀於溪上城之下有洞穴名曰翰林洞隄南數武有流杯池釣鼈臺稍遠有化龍池鐵峯諸勝南北崖并泐三元隄三字新出土中石工鷺足溪間鑿石齒齒視之皆爲暗樨膠

# 安岳縣志

## 卷六

隄堰

三

以灰漿上下平廣尺寸一如舊式所謂礮密鞏固者功倍於昔而取石肘下費不繁滋事之相因而成者固如是矣夫隄必取名三元欲士之大有成就也蓄水之意欲其淳泓深廣若文之有波瀾迴折也文之能波瀾迴折必有學以養之氣以聚之機以杼之神以行之而後澄之則清鑑之則明紆徐卓犖而無所障礙也然則三元之名與其驗固不僅在乎石之屹而亦在乎人之靈矣乎至於旱澇之蓄洩露冕之遊觀固築隄者之餘意而興復古迹玉成人才殆所兢兢也余旣喜隄之落成



而又樂吾友之亟民事也爲之記貞諸樂石

重修三元隄記

邑令 徐觀海

余以丁酉奉調入闈得窺全蜀人文之盛比揭榜而安岳無一人與選自愧教養之責科名不振抑亦守土者羞也旣公旋與一二父老咨嗟談往日事因考邑乘南門外有溪環學宮前人築隄瀦水使停而不奔以聚形勢是以歷來科名不絕此雖形家者言然君子之求治也凡有益於民皆當舉之昔漢曹景完令邵陽開南寺門承望華嶽遂使學者多獲人爵之報矧士爲四民之

安岳縣志

卷六

隄堰

五

首鼓舞作興俾凡民觀感共勉於學先務之急莫過於是苟可幹旋造化安得諉爲冥漠不知之氣運以聽之耶特慨然捐金又稍稍勸輸得緡錢二百千踵其舊址重加築石續前人之蹟培士林之基凡四閱月旣葺工堅整完好堪以垂久夫稽古之榮獲報不爽卽有厄於時命者什不得一二是以有志之士束身圭璧修天爵以待人爵自當脫穎而出區區障隄蓄水爲此小補之計曾何與焉惟在自好者憬然悟躍然起也則余修隄之意是卽勸學之意或亦有能諒者夫



重修三元隄及新修迎恩隄記

邑令 龔聯輝

邑環溪爲城城逶迤鳳山之麓而溪繞其下其上流則賈浪仙亭其南岸則釣鼇臺奎星閣峙其東翰林洞麗其北流杯池當溪之中溪雖小一邑之形勝於是焉聚皆石骨結成因名之曰龍溪溪隘而不闊淺而不深陡而不平故其水春與冬竭而不盈其石高下懸殊故其流甚駛而不停易洩而不能蓄倚岸良田無以資水利限於地勢者然也明末名宦巴陵顏秉鈞先生舉邑城而築之竝修三元諸隄當獻賊之變山林鬱湮隄遂

安岳縣志

卷六

隄堰

三

爲水冲坍乾隆戊戌錢塘徐司馬莅是邑紹興古跡復修三元隄建觀音閣於南岸隄砌石三級高六尺廣一丈修十丈有七尺盈盈有半里許其水上泝高橋足以溉田者數十餘畝沿岸數十戶居民歌利澤焉方欲修迎恩隄以陞授湖北清軍廳去任而待澤下流者惘然無以挹彼注茲也庚辰冬予承乏茲土謀所以興民利者惟水利爲最見三元隄蓄水不厚仰給者不過數十家因增高四尺其廣與修如前隄之舊其水則上泝至仁里莊所灌之田可以數百畝計矣然猶未足以舉附



郭之田而盡溉之也於是急謀復迎恩隄隄本前任西江周惺甫曾經修理方落成卽坍於水以監工未得人且未若水之性也予因偕進士周樸亭文學陶鴻甄竝邑紳往觀之樸亭進曰前隄之毀以其橫梗於中也水橫則性急曷若順其性而導之可以不朽鴻甄又進曰水之有所阻也不能順流於上必沖激於下隄之壞也毀於底之不堅者過半所謂河魚腹疾者是也前此之毀底不堅耳今欲永久非鑿泥見石未可以云固也予可其說卽以陶生董其事順水之性而浚深其底直至

安岳縣志

卷六

隄堰

五

石骨始架石於其上沒入於泥者三層其層高二尺共六層底廣三丈面廣一丈長十一丈募化僅數百金予捐廉四百有四籌款數千厯兩紀而完善如故中砌以腰隄水直達三元隄之漑自是附郭之田均資灌漑其沾潤者數千百餘畝矣迄今過岳陽者瞻鳳山之麓浪仙之亭釣鼇臺翰林洞流杯池奎星閣其形勝固如昨也而掩映於清且漣漪者注於不竭之源焉視向之易洩而不能蓄爲何如也至於彤家謂可澡浴人才夫觀其流泉古人不廢益不能無厚望於邑人士也是役也



余縻於茲四稔矣所欲爲地方興久遠之利者尙不止於是而顧以濫膺卓異將舍此北上僅能增添膏火數百金修奎星閣培三元隄及新修迎恩隄其所待舉者如龍門隄及未竟之緒尙多不能不俟諸後之君子抑或有俟予之歸來耶

舊志按邑境環繞皆山地方寥闊除三元隄外並無長江大堰查前志所載新舊塘堰共六百一十有五祇千工白馬石牛山溝等堰僅存其名餘俱無考乾隆二十一年前邑令江伍圖奉文諭民量地修築通計在城鄉

## 安岳縣志

### 卷六

隄堰

七

新舊溪堰池塘共九十有四附郭鄉共三百零五喜井鄉共一百五十有七同化鄉共三百三十有八長寧鄉共一百六十有六折桂鄉共一百八十有四永康鄉共六百賴興鄉共一百一十有六保安鄉共八十有七咸通鄉共八十有一新舊塘堰總計二千一百二十六處均係因地制宜冊報有案至於丈尺水勢與夫各堰名色難以逐一臚列特詳其數以備考云

